

KERATAN AKHBAR

TARIKH : 21 JULAI 2025
AKHBAR : BERITA HARIAN
MUKA SURAT : 12

RMK 13 : Harapan dan agenda tambah baik sosioekonomi rakyat

12 Rencana Isnin, 21 Julai 2025

RMK13: Harapan dan agenda tambah baik sosioekonomi rakyat

● RMK13 diharap mempercepatkan peralihan daripada model ekonomi bergaji rendah kepada ekonomi berasaskan inovasi dan teknologi tinggi

● Penekanan perlu diberikan terhadap kesihatan awam, pendidikan, digitalisasi dan kesejahteraan rakyat menyeluruh



Oleh Dr. G. Manimaran
bhrencana@bh.com.my

Rancangan Malaysia Ke-13 (RMK13) sudah pasti bakal dilaksanakan bagi tempoh lima tahun mulai 2025-2030.

Pada hari ini kita sudah mula bercakap mengenai rupa wajah RMK13 yang sedang digubal, terutama membbabitkan pembuat dasar dan industri. Rancangan Malaysia yang digubal dan diluluskan Parlimen setiap lima tahun menjadi perhatian, seperti juga belanjawan tahunan. Kedua-duanya ada hubung kait satu sama lain, tetapi belanjawan tahunan menjadi lebih fokus, kemungkinannya ia bersifat jangka pendek iaitu diumum untuk dilaksanakan dalam satu tahun.

Selain itu, Rancangan Malaysia lazimnya bersifat makro, kadangkala sukar difahami rakyat, tetapi perancangan lima tahun kekal penting kerana ia asas kepada dasar pembangunan negara dalam jangka panjang.

Ini bukan sekadar dokumen dasar, tetapi pelan tindakan lima tahun menetapkan hala tuju ekonomi, sosial, alam sekitar dan tadbir urus negara, membolehkan kerajaan menetapkan keutamaan dan sasaran realistik berdasarkan cabaran semasa serta potensi masa depan.

Setiap rancangan Malaysia mempunyai keunikan tersendiri bagi memenuhi keperluan dan menangani cabaran mengikuti persekitaran sosioekonomi dan kepimpinan politik.

Kandungannya dirangka sedemikian rupa untuk memenuhi harapan pemegang taruh. Kita ada 12 rancangan Malaysia setakat ini, termasuk dua Rancangan Malaysia (1966-1968) dan Buku Kuning (1961-1965) sebelum itu, digunakan sebelum Persekutuan Malaysia dibentuk.

● RMK1 (1966-1970) dirangka untuk mempercepatkan pembangunan ekonomi di negeri Borneo serta perubatan pertama merancang pembangunan bagi Semenanjung Tanah Melayu dan negeri Borneo secara bersama.

Matlamatnya ialah:

- i. meningkatkan taraf hidup rakyat, khususnya di kawasan luar bandar;
- ii. mengurangkan kadar kemiskinan;
- iii. merapatkan jurang ekonomi antara kawasan bandar dan luar bandar;
- iv. memajukan sektor pertanian sebagai asas pembangunan ekonomi;
- v. memperluas peluang pekerjaan dan mengurangkan pengangguran;
- vi. mempertingkatkan pembangunan luar bandar melalui infrastruktur dan kemudahan asas;
- vii. memajukan sektor perindustrian untuk membalak ekonomi negara;
- viii. menggalakkan perpaduan nasional melalui pembangunan lebih seimbang antara wilayah dan kaum.

RMK1 juga menyaksikan penubuhan agensi penting seperti FELDA, Majlis Amanah Rakyat (MARA) dan Institut Penyelidikan Dan Kemajuan Pertanian Malaysia (MARDI) untuk menyokong pembangunan sosioekonomi luar bandar dan memperkukuh penyertaan Bumiputera dalam ekonomi.

● RMK2 (1971-1975) adalah rancangan pembangunan terbesar dan keazaman pernah dijalankan. Ia memastikan usaha lebih besar berbanding sebelum itu, berdasarkan Dasar Ekonomi Baharu (DEB). Terdiri daripada dua matlamat iaitu membasmi kemiskinan tanpa mengira kaum dan menyusun semula masyarakat.

● RMK3 (1976-1980), iaitu fasa kedua dalam pelaksanaan DEB. Ia dilihat sebagai satu usaha berani, kreatif dan berpandangan jauh untuk menangani cabaran sosioekonomi dan politik ketika itu. Inisiatif paling besar pernah dilaksanakan demi kepentingan seluruh rakyat.

● RMK4 (1981-1985) berteraskan prinsip bahawa ekonomi negara dijangka berkembang dan lebih pelbagai. Peluang untuk pengembangan ekonomi diandaikan cerah. Tumpuan utama diberikan kepada kesan perkembangan luar terhadap ekonomi Malaysia, terutama kadar kenaikan harga domestik.

● RMK5 (1986-1990) dirangka berdasarkan kemajuan sosial dan ekonomi yang dicapai, kelemahan dialami, serta cabaran bakal dihadapi. Ia satu rancangan untuk penyatuan dan pengurusan ekonomi secara cekap dengan penekanan kepada usaha memperkukuh pencapaian sedia ada serta memperkatakan lagi ekonomi.

● RMK6 (1991-1995) adalah fasa pertama pelaksanaan Rangka Rancangan Jangka Panjang Kedua (RRJP2), merangkumi Dasar Pembangunan Nasional (DPN), menetapkan objektif, strategi dan sasaran menyeluruh bagi membimbing pembangunan negara sepanjang 1990-an.

● RMK7 (1996-2000) mengekalkan dan menekankan semula konsep pembangunan seimbang diperkenalkan pada 1991 sebagai ciri utama DPN. Ia termasuk memberi perhatian serius terhadap strategi bagi menjaga pertumbuhan ekonomi mampan serta memastikan manfaat pertumbuhan ekonomi diagihkan secara saksama dalam kalangan rakyat dan antara negeri.

● RMK8 (2001-2005) menggariskan langkah diambil ke arah menjadi negara bersatu dan maju sepenuhnya mengikut acuan sendiri menjelang 2020. Strategi dan program dibentangkan bertujuan memperkukuh asas negara untuk lebih berdaya tahan dan berdaya saing.

● RMK9 (2006-2010) merangkumi strategi, program dan peruntukan diperlukan bagi tujuan merealisasikan misi nasional dan menjadikan

Malaysia negara lebih maju, saksama dan bersatu padu. Ia turut menggariskan misi nasional sebagai rangka dasar dan pelaksanaan terdiri daripada lima teras utama bagi mencapai matlamat Wawasan 2020.

● RMK10 (2011-2015) berasaskan aspirasi Program Transformasi Kerajaan dan Model Baharu Ekonomi (MBE) berteraskan pendapatan tinggi, keterangkuman dan kemampanan.

Ia menyediakan pentas bagi transformasi struktur utama diperlukan ekonomi berpendapatan tinggi serta hala tuju dasar, strategi dan program baharu membolehkan negara tampil sebagai negara maju dan berpendapatan tinggi.

● RMK11 (2016-2020), rancangan pembangunan lima tahun terakhir ke arah merealisasikan matlamat Wawasan 2020. Bertumpu kepada enam strategi, iaitu Inklusiviti, Kesejahteraan Rakyat, Modal Insan, Pertumbuhan Hijau, Infrastruktur serta Inovasi dan Produktiviti.

● RMK12 (2021-2025), fasa terakhir dalam pelan pemulihan negara di bawah pendekatan 6R iaitu reform, bagi memastikan Malaysia berada pada landasan kukuh bukan sahaja dalam menangani isu dan cabaran sosioekonomi semasa kesan pandemik COVID-19, tetapi untuk mencapai pertumbuhan ekonomi jangka panjang mampan. Ia dirangka untuk membina asas kukuh dalam membentuk sebuah negara berteknologi dan berpendapatan tinggi dengan pengalihan lebih saksama.

Perlu ada input dan cadangan

Ketika usaha dan proses merangka RMK13 giat berjalan, pelbagai pihak telah dan sedang berusaha mengemukakan input, cadangan dan saranan masing-masing.

RMK13 diharap memperkenalkan peralihan ekonomi ke arah nilai tinggi iaitu mempercepatkan peralihan daripada model ekonomi bergaji rendah kepada ekonomi berasaskan inovasi dan teknologi tinggi.

Selain itu, RMK13 diharap memacu ekonomi rendah karbon, khususnya dalam sektor minyak, gas dan tenaga. Penekanan ke arah pembangunan modal insan dan pendidikan masa depan juga ditekankan.

Sementara kita menyaksikan perubahan drastik dalam pelbagai sudut dan sektor, termasuk demografi, pendidikan dan teknologi, turut diharap ialah pembaharuan kesihatan dan perlindungan sosial.

Usaha menstruktur semula sistem kesihatan awam, termasuk kesihatan mental dan penjagaan warga emas serta memperluas perlindungan sosial kepada golongan B40 dan komuniti rentan wajar diberi keutamaan.

RMK13 juga diletakkan harapan tinggi untuk mampu meningkatkan kesejahteraan bandar dan luar bandar, kelestarian alam sekitar dan tindakan iklim, tatakelola baik dan reformasi institusi dan transformasi digital dan jurang teknologi.

RMK13 dinantikan dengan penuh harapan. Ia perlu datang dalam pembaharuan menyeluruh. Dalam persekitaran amat mencabar perlu ada program, inisiatif dan dasar boleh memenuhi aspirasi rakyat iaitu menambah baik taraf sosioekonomi dalam mengharungi tahun mendatang.



